

Itinalaga sa Kapuksaan Galacia 1:6-9

*Ipinangaral ni Pastor Larry John Sy¹
(Hinalaw mula sa Komentaryo ni Dr. John MacArthur, Jr.)²*

Panimula

- Sa buong kasaysayan may itinalaga ang Diyos na mga bagay, tao, at bayan sa pagkapuksa. Halimbawa, sa bayan ng Jericho sinabi ng Diyos, (Josue 6:17-18) *“Ang buong lunsod at ang anumang matatagpuan doon ay tutupukin bilang handog kay Yahweh. Si Rahab lamang at ang kanyang mga kasambahay ang maliligtas... At huwag na huwag kayong kukuha ng anumang bagay roon; lahat ay tutupukin. Kapag kumuha kayo ng anuman, kayo ang magiging sanhi ng pagkapahamak ng buong Israel.”*
 - Ngunit nilabag ni Achan ang utos na ito ng Diyos (Josue 7:1);
 - Dahil dito, nadamay sa kapahamakan ang buong bayan ng Israel, at *“...iyan ang dahilan kaya hindi sila makaharap sa kaaway...”* (7:12)
 - Pagkatapos na tupukin si Achan, ang kanyang mag-anak at kanyang mga ari-arian, *“Naglubag ang galit ni Yahweh. Mula noon, ang pook na iyo’y tinawag na Lambak ng Kapighatian”* (7:25-26). Ibig sabihin ng *“achor”* ay kapighatian at nagsisimbulo ng magiging kapalaran ng sinumang susubok na makinabang sa mga bagay na isinumpa na ng Diyos.
- Sa Bagong Tipan, may dalawang uri ng mga tao na itinalaga ng Diyos sa kawasakan –
 - Una – *“[Sumpain} ang sinumang walang pag-ibig sa Diyos!”* (1 Cor. 16:22)
 - Ikalawa – mga huwad na guro; mga bulaang propeta; at tungkol sa kanila maraming sinabi ang Salita ng Diyos (Gal. 1:8-9; Mateo 24:24; Juan 8:44; 1 Tim. 1:20).
 - Nang sawayin ni Pablo ang salamangkerong Elimas dahil sumasalansang ito sa kanilang pangangaral; inilantad ni Pablo ang apat na katangian ng mga bulaang mangangaral:
 - 1) anak ng demonyo/diyablo;
 - 2) kaaway ng lahat ng mabuti;
 - 3) tigib sa pandaraya at kasamaan;
 - 4) pinipilipit ang katotohanan tungkol sa Panginoon.
- Isa sa pinakatanyag na katangian ni Satanas at ng kanyang mga tagasunod ay ang pandaraya o panlilinlang. Nagagawa niya ito sa pamamagitan ng mga tao na karaniwan pa nga ay mga punong panrelihiyon. Inilalarawan sila ni Pablo sa –
 - 2 Cor. 11:13-15 --- maaaring magkunwaring mga lingkod ng Diyos ang mga bulaang guro
 - 1 Tim. 4:1-2 --- patungkol sa mga taong nagagamit ni Satanas bilang mga *“magdarayang espiritu.”*
- Ganoon na lamang ang pag-aalala ni Pablo sa iglesya tungkol sa panglalason ng mga bulaang aral kaysa anupamang dahilan (2 Cor. 11:3-4).
 - Binalaan niya ang mga pinuno ng iglesya sa Efeso. Basahin ang Mga Gawa 20:28-30.
- Ang pangunahing patatamaan ni Satanas ay ang doktrina ng kaligtasan, dahil kapag ang tao ay nalito tungkol dito wala na silang paraan pa na makalapit sa Diyos, kung kaya’t sila’y mananatiling kontrolado at naiimpluwensyahan ni Satanas.
 - Basahin ang babala ni Pedro sa 2 Pedro 2:1-2
- Ang mga bulaang propeta ay mas interesado sa kanilang katanyagan kaysa sa katotohanan. Pansinin natin ang sinabi ni Pablo sa...
 - Galacia 6:12, *“Ang mga naghahangad magbigay-lugod sa tao ang mamimilit sa inyong kayo’y patuli. Ginagawa nila iyon upang huwag silang usigin dahil sa krus ni Cristo.”*
 - Gawa 20:29-30, *“Alam kong pagkaalis ko’y magsisipasok ang mababangis na asong-gubat at walang patawad na sisilain ang kawan. Mula na rin sa inyo’y lilitaw ang mga taong magsasalita ng kasinungalingan upang mapasunod ang mga alagad, at sa gayo’y mailigaw sila.”*
- Inilarawan din sila ni Pedro sa 2 Pedro 2:12-15, 17-18 (Basahin).
- Ganitong uri ng bulaang mangangaral, mga maka-Judio (Judaizers), ang nanggugulo sa iglesya ng Galacia, Itinuturo nila upang maging Cristiano ang mga Hentil ay kinakailangan muna nilang magdaan sa pagka-Judio sa pamamagitan ng pagpapatuli; upang mapanatili at makamit nila ang katuwirang mula sa Diyos ay kinakailangan daw nilang sundin ang lahat ng kaugalian at batas-Judio.

¹ Naipangaral ito sa Disciples of Christ Community Church noong Hulyo 9, 2000.

² Mula sa The MacArthur New Testament Commentary: Galatians, [Moody Press: Chicago], 1983.

- Sa mga talatang ito itinuro ni Pablo ang tatlong sangkap ng kanyang pagsalansang sa kasumpa-sumpang doktrinang itinuturo ng mga maka-Judio.

Pagtalakay

I. Pagtataka ni Pablo sa Pagtalikod ng mga taga-Galacia (1:6)

A. Madaling Pagkakatalikod

1. Nagtataka (thaumazo sa Griego) --- nabigla, hindi agad naintindihan, namangha.
 - a. Hindi siya nagtaka sa pangugulong ginagawang ng mga bulaang mangangaral.
 - b. Nagtaka siya sa maaliwalas na pagtanggap ng mga Cristiano sa Galacia sa mga bulaang mangangaral.
2. Madali (tacheos) – kay dali, mabilis, handang-handa, napakadali.
 - a. Ni hindi na halos tumanggi ang mga taga-Galacia;
 - b. Kaya't madali ring nagbago ang paninindigan nila tungkol kay Pablo sa kanyang mga aral.
3. Sila'y tinuruan ng pinakamatinding guro, liban sa Panginoong Jesus.
 - a. Tinanggap nila ang pinakamahusay na pagtuturo mula kay Apostol Pablo;
 - b. Tunay nga na napakalaki at matindi ang pangangailangan sa pangangaral at pagtuturo na patuloy na inuulit ang mga katotohanan ng mabuting balita (2 Pedro 1:12-15);
 - c. Ngunit hindi laging garantiya ang katagalan na sa pagka-Cristiano o kahit na mahusay na pangangaral upang hindi makabitaw at mapayagang mapahina ng mga baluktot na aral.
 - d. Ang mga taga-Galacia ay mga tunay na Cristiano (3:3, 5; 4:6, 8-9); mga kapatid (1:2, 11; 3:15; 4:12, 31; 5:13) na nalilito at nasa panganib.
4. Sila'y tumalikod
 - a. Tinalikdan (metatithemi sa Griego) --- ginagamit sa mga sundalo na tumalikod sa kanilang tungkulin na ang katumbas na parusa ay kamatayan; ayon sa pagkakasulat sa Griego, sila ay kusang-loob na tumalikod.
 - b. Mananagot ang mga bulaang guro sa pagbabaluktot nila ng mabuting balita, at mananagot rin ang mga taga-Galacia sa madali nilang pagkakalinlang!
 - c. Ang kanilang tinalikdan ay di lamang ang mabuting balita, kundi ang mismong Diyos na tumawag sa kanila "*sa pamamagitan ng pag-ibig ni Cristo...*"
 - 1) pagkakatawag --- maaaring salin ay "ang tumawag sa inyo ng minsanan."
 - 2) Pansinin ang mga talatang ito --- 2 Tesa. 2:13-14; 2 Tim. 1:8-9; 1 Pedro 1:15 at lalo ang Roma 8:30.

B. Patungo sa Ibang Mabuting Balita

1. Ang natatanging mabuting balita ng Diyos ay...
 - a. mabuting balita ng Kanyang kagandahang-loob (Efeso 2:8-10; Roma 5:2)
 - b. nabubuhay tayo sa Kanyang kagandahang-loob mula pa sa punto ng kaligtasan, at kung tumigil ang kagandahang-loob na ito ng Diyos, tiyak na mawawala ang di-pinaghirapang kaligtasan at tayo'y mapapahamak sa ating kasalanan.
2. **Ang pag-ibig (biyaya) ni Cristo** ay tumutukoy sa malaya at nakapangyayaring gawa ng Diyos na may pag-ibig at habag sa Kanyang pagkaloob ng kaligtasan sa pamamagitan ng kamatayan at pagkabuhay na mag-uli ni Jesus.
 - a. walang halong gawa o magagawa ang tao; ito'y napapanatili Niya hanggang sa kaluwalhatian
 - b. isang kalokohan na pagkatapos mong tanggapin ang mabiyayang kaligtasan ay panatilihin mo ang katuwirang ito sa pamamagitan ng sariling gawa, seremonya o rituwal.
3. Panliligaw ng mga maka-Judio
 - a. Sila'y nagpapanggap na mga Cristiano at karamihan sa kanilang itinuturong doktrina ay may bahid ng katotohanan (orthodoxy).
 - b. Malamang na kinikilala nila na si Jesus ang ipinangakong Mesias at maaari rin na tinanggap nila ang kahalagahan ng Kanyang sakripisyong kamatayan sa krus.
 - 1) kasi kung hindi, tiyak na hindi na sila pinakinggan agad ng iglesia;
 - 2) maaaring sinasabi nila na nananalig din sila sa iba pang katotohanan na pinaniniwalaan ng mga Cristiano;
 - 3) hindi nila lantarang itinatangi ang mabuting balita, subalit kanila daw itong pinahusay (improved) sa pagdadagdag ng mga reglamento, seremonya at pamantayan ng Lumang Kasunduan.
 - c. Ngunit gigibain ng anumang pagdadagdag o pagbawas sa grasya (biyaya). Tingnan ang Roma 11:6.

C. Panganib na Nakapaninira sa Mabuting Balita

1. Hindi ateismo, paganong relihiyon, o mga kulto ang pinakamatinding panganib sa mabuting balita kundi mga ...

- a. Kilusang Cristiano na maraming tamang doktrina ngunit ang mga namamali nilang doktrina ay hindi pinapansin dahil "harmless" daw
- b. Isang patak na lason sa isang dram ng tubig ay sapat na upang makamatay!
- c. Isang huwad na aral na tatapyas o ihahalo sa doktrina ng grasya ay sapat na upang sirain ito --- sirain ang buong sistema ng ating pananampalataya.
2. Hindi ito mapapayagan ni Pablo
 - a. Pansinin ang sinabi niya sa Galacia 5:4.
 - b. Hindi ito patungkol sa nawawalang kaligtasan, kundi napuputol ng huwad na doktrina ng mga maka-Judio ang daloy ng ugnayan (fellowship) at kapangyarihan ni Cristo sa mananampalataya.
3. Dahil nga sa pagtuturo ng mga maka-Judio ng ibang mabuting balita, naapektuhan ang mga taga-Galacia.
 - a. Galacia 3:3
 - b. Galacia 4:9
 - c. Galacia 5:7

II. Kaalaman ni Pablo sa Panlilinlang ng mga Bulaang Guro (1:7)

A. Walang Ibang Mabuting Balita

1. **Iba** (allos sa Griego) --- iba na magkapareho; exactly the same kind.
 - a. Iisa lamang ang tunay na mabuting balita ng "biyaya."
 - b. Ngunit para sa maka-Judio, ang pinagsamang biyaya at gawa (seremonya, pagtutuli) ay siyang tunay na mabuting balita.
2. **Nanliligalig** (tarasso sa Griego) --- alugin, gilingin, haluin; nagugulumihanan, nagugulo ang isip.
 - a. Katulad ng naramdaman ni Haring Herodes nang mabalitaan niya ang pagkapanganak ng Hari ng mga Judio (Mateo 2:3);
 - b. Katulad ng naramdaman ng 12 alagad nang makita nila si Jesus na lumalakad sa ibabaw ng tubig (Mateo 14:26).
3. **Nagsisikap na baguhin** (metastrepho) --- baluktutin, baguhin ang isang bagay sa paraang pataliwas o pabaligtad.
 - a. Ang anumang idadagdag na batas (gawa) sa grasya ay hindi lamang kaunting polusyon dito kundi binabaligtad at winawasak na ito.
 - 1) Ang grasya ay maaaring wasakin ngunit hindi maaaring dagdagan o bawasan;
 - 2) Maaari itong tanggapin ngunit hindi mababago.
 - 3) Nagpaalala si Pablo sa Galacia 5:2-4 at Titi 1:10-11.

III. Babala ni Pablo sa Pamumuksang Gagawin ng Diyos (1:8-9)

A. Mataas daw na Kredensyal

1. Malamang na ang mga maka-Judiong ito ay nagsasabing sila raw ay galing sa iglesya ng Jerusalem at mga isinugo ni Santiago, ang pinuno ng iglesya (Gawa 15:24).
2. Hindi lamang sila nagtuturo ng ibang mabuting balita, kundi hangad din nilang sirain ang otoridad at katuruan ni Pablo sa lahat ng posibleng paraan.

B. Kabaligtaran ng Legalismo

1. Ang kamaliang ito ng mga maka-Judio ay maliwanang na legalismo.
2. Sa kabilang dulo naman nito ay libertinism o antinomianism
 - a. dahil naman sa kalayaan galing kay Cristo, ang Cristiano raw ay hindi na kailangang magpasakop sa pamantayan ng katuwiran at moralidad.
 - b. May babala diyan ang Judas 4.
3. Anumang aral na nagdaragdag o nagbabawas sa katotohanang inihayag ng Diyos ay pagbabaluktot sa mabuting balita at sinisira nito ang katangian at gawa ni Cristo.

C. Apostol man o Anghel

1. Kahit na sina Pablo pa o kanyang mga kasamahan ay magbago ng kanilang aral, hindi na dapat pa silang pakinggan at tratuhin na silang mga heretiko, sapagkat iyan na ang tunay nilang kalagayan.
2. Kahit pa isang anghel ang mangaral ng ibang mabuting balita, dapat din nilang tanggihan.
 - a. Naniniwala ang mga Judio na ang Batas ng Diyos ay dumating sa kanila sa pamamagitan ng anghel (Hebreo 2:2);
 - b. At maaari ngang ginamit na punto ito upang lalong pagtibayin ng mga maka-Judio na ang mga seremonya ng Lumang Kasunduan at mga tradisyong Judio ay may kinalaman pa rin sa mabuting balita.
3. Ang uri ng pananalita ni Pablo rito ay isang pagbabakasakali -- hypothetical

- a. hindi ibig sabihin na magagawa nga nila (mga postol) at ng mga banal na anghel na magturo ng laban sa hayag na katotohanan ng Diyos;
 - b. para lang sinagad ni Pablo ang kanyang ibig sabihin na --- sinuman, kahit na apostol o anghel pa --- kahit na mukhang nakapa-maka-Diyos at napakabuti --- ang mangaral ng iba sa aral na naituro na nina Pablo ay di na nararapat paniwalaan o pakinggan.
4. Ang sukatan ay mensahe ng katotohanan at hindi kredebilidad ninuman.
- D. Pagdidiin ni Pablo sa Sumpa (t. 9)**
1. *“Sinabi na namin at inuulit ko..”*
 - a. Hindi siya nag-uulat sa nakalipas na talata lamang kundi ito'y paalala niya na naituro na niya ang babalang ito noong unang bumisita siya sa mga taga-Galacia.
 - b. Nang magsimula siyang maglingkod sa kanila, nagbabala na siya tungkol sa mga babaluktot sa mabuting balita.
 - c. Tinanggap na nila noon ang mabuting balitang ito. Ito ang mabuting balitang hindi mababago ninuman.
 2. Nakatalaga na ang mga bulaang mangangaral sa paghahatol ng Diyos --- sila'y tutupukin.
 - a. pakasumpain --- nakatalaga na sa kawasakan;
 - b. Babala rin ni Juan sa 2 Juan 7, 10-11 ay ni huwag daw papasukin sa bahay o batiin ang mga huwad na mangangaral.
 3. Dapat layuan ng mga Cristiano ang lahat ng bulaang mangangaral, gaano man kaganda at husay ng kanilang mga kredensyal.
 - a. isang kamangmangan at labag sa Kasulatan na maniwalang maaari tayong manatili sa isang iglesya o paaralan na itinatakwil ang Biblia at nagbabaluktot ng mabuting balita, sa kagustuhan lamang ng mananampalataya na maging mahusay na impluwensiya para sa Panginoon.
 - b. Kahit si Timoteo, na sinanay sa katotohanan, ay binalaang lumayo sa mga bulaang mangangaral at sa kanilang mga aral ---
 - 1) 1 Timoteo 4:6-7, 13
 - 2) 2 Timoteo 2:15-17
 - c. Paglabag sa utos ng Diyos ang mapayagan ang sarili na makinig at maimpluwensyahan ng bulaang aral--
 - 1) napapalampas mo na baluktutin nito ang kagandahang-loob ng Diyos dahil kay Cristo Jesus;
 - 2) nakokompromiso at napapahina mo ang iyong patotoo.

Pagtatapos

- May mga pinaniniwalaan, pinakikinggan, o pinahihintulutan ba kayong paghahayag ng bulaang aral?
- Anu-anong mga dahilan bakit mo pinapayagan ito? Ayon sa ating napag-aralan, inaamin mo ba na di-tama at kasalanan ito?
- Nakikita o napapansin mo ba ang kalagayang ganito sa ibang kapatid mo sa pananampalataya? Ano ang pananagutan mo sa kanila? Ano kaya ang nararapat mong gawin?